

## Marko 10

### 1.

1. Y el a sali di'ei pa bai tera di Judea, y pa otro banda di Jordan, y un multitud grandi a bolbe bini serka djé, y manera tawata kustumbra, ela bolbe siña nan.
2. Y e Fariseonan a bini serka djé y a puntr' é; Ta permiti pa un homber bandona su mohé? Nan a hasi esaki pa tent' é.
3. Ma el a kontesta nan: kiko Mozes a manda boso?
4. Y nan disi: Mozes a permiti nos skirbi karta di divorsio y bandon' é.
5. Y Jesus a kontesta nan: Pa via di boso kurasón duru el a duna boso e mandamentu aki.
6. Ma fo' prinsipio di mundu Dios a traha homber i mohé.
7. P'esei un homber lo bandona su mama y tata y lo ta huntu ku su mohé.
8. Y e dosnan ei lo ta un karni, asina nan lo no ta dos mas, ma un karni.
9. Loke Dios a uni anto, no laga hende parti esei.
10. Y na kas su disipelnan a bolbe puntr' é dje mes asunto.
11. Y é disi ku nan: Kwa, ku bandona su mohé i kasa ku un otro, esei ta komete adulterio kontra su mohé.
12. Y si un mohé bandona su hòmber y kasa ku un otro, é ta komete adulterio.
13. Y nan a trese e muchanan chikitu seka djé, pa é toka nan i e disipelnan a repende esnan , ku a trese nan.
14. Ma ora Jesus a mira esei, ela disgusta i disi ku nan: Laga e muchana bini seka mi, no stroba nan, pasobra di nan lo ta e reino di Dios.
15. Di berdad mi ta bisa boso, esun ku lo no risibi reino di Dios manera un mucha, lo no drenta den.
16. Y el a tuma nan den su brasa y pone su man riba nan y bendishona nan.
17. Y ora é tabata bai riba kaminda, un a kore bin serka djé y kai na rudia y puntr' é: Bon Maestro, kiko lo mi hasi, pa mi haya bida eternu?
18. Y Jesus disí ku ne: Pakiko bo ta yama mi bon ? Ningun hende no ta bon, sino Dios so.

19. Bo sabi e mandaméntunan: No mata, no kibra matrimonio, no horta, no duna testimonio falsu, no hasi ningun sorto di ladronisia, onra bo tata y bo mama.
20. Y el a kontes'té; Maestro, tur e kosnan aki mi a warda fo'i tempu di mi mucha.
21. Y Jesus, ora el a mir'é, el a stim'é, y disi ku né: un kos ta faltá bo: bai y bende tur loke bo tin y duna na pover y lo bo haya un Tesoro den shelu, bin y sigí mi.
22. Ma el a sinti duele riba e palabra aki y el a bai tristu pasombra é tabatin hopi posishon.
23. E ora Jesus a mira rond y disi ku su disipelnan: Kon trabahoso ta pa nan, ku tin rikesa, drenta reino di Dios.
24. Y su disipelnan a admira su palabranan. Y Jesus a bolbe kontesta nan: Yunan, ki trabahoso ta pa drenta reino di Dios.
25. Ta mas fasil, pa un kamel pasa den wowo di un anguwa, ku un riku drenta den reino di Dios.
26. Y nan a spanta mas, bisando den nan mes: Ken por ta salbá anto?
27. Y Jesus a mira nan i disí: seka hende ta impusibel, ma seka Dios no, pasombra tur kos ta posibel seka Dios.
28. Y Pedro a kumisa bisa n'é: Mira, nos a bandona tur kos y sigi bo.
29. Y Jesus a kontest'é: Di berdad mi ta bisa boso, no tin ningun, ku a bandona kas, ruman homber ó ruman mohé, tata, mama, mohé, yunan, teranan pa mi kausa y di evangelio,
30. Ku lo no risibi shén tantu, den e tempu aki, kas, ruman homber y ruman mohé y mama y yunan y teranan ku persigiméntu; y den siglo ku ta bini, bida eterna.
31. Ma hopi ku ta promé, lo ta ultimo, y ultimo lo ta prómé.
32. Y nan tabata kaminda ta bai Jerusalem y Jesus a bai nan dilanti; nan tawata spantá y tawata sigi'é ku miédu y el a kumisa bisa nan, kiko lo sosode ku ne:
33. Mira, nos ta bai pa Jerusalem y Yu di hende lo ta entregá na e saserdotenan y na sabionan di lei, y lo ta husgá pa morto y lo ta entregá na paganunan.
34. Y nan lo bofóna di djé y nan lo skupi'é, zut'é, y mat'é y di tres dia lo é lamta.
35. Y Santiago y Juan, e yiunan di Zebedeo, a bin serka djé, bisándo: nos ke pa bo hasi pa nos, manera nos pidi bo.

36. Y e disí ku nan; kiko boso ke mi hasi pa boso?

37. Y nan disí ku ne: Laga, ku nos por sinta, un na bo man drechi y otro na bo man robes, ora bo ta den bo gloria.

38. Ma Jesus disí ku nan: boso no sabi, kiko boso ta pidi; boso por bebe di 'é kopa ku mi ta bebe y ser batisa ku e bautismo ku kwa mi ta batisa?

39. Y nan disí ku ne : Nos por. Ma Jesus disí ku nan: Di' é kopa, ku mi ta bebe, boso lo bebe, y wordu batisá ku e bautismo, ku kwa mi ta batisá.

40. Ma pa sinta na man drechi i robes, esei no ta mi por duna, ma lo ta duná na esnan, pa kwanan esei ta prepara.

41. Y ora e diesnan a tende esaki, nan a tuma Santiago y Juan na malu.

42. Ma Jesus a yamanan seka djé, y disí ku nan: Boso sabi ku esnan ku ta pasa komo prinsipénan di pueblo, ta goberna riba nan grandinan tin poder riba nan.

43. Ma den boso no ta sosode asina, pero esun, ku ke bira grandi den boso, mesté ta boso sirbidó.

44. Y esun, ku ke ta promé den boso, mesté ta sirbidó di tur.

45. Pasoba yu di hende no a bin pa nan sirbi' é, ma pa e sirbi nan y duna su alma komo pago pa salbashon di hopi.

46. Y nan a bin pa Jerico y ora ela sali fo' í Jerico, ku su disipelnan y un multitud grandi, Bartimeo, yu di Timoteo, un pidido di limosna, tabata sinta banda di kaminda.

47. Y ora el a tende ta Jesus, e Nazareño, el a kumis' á grita, y bisa: yu di David, tene misericordia di mi!

48. Y hopi a tah' é y mande keda ketu, ma el a grita mas duru: Yu di David tene misericordia di mi!

49. Y Jesus a para y a manda nan yam' é, y nan a yama e siégu, bisando n' é: Tene bon animo, lamta, e ta yama bo.

50. Y el a kita su mantel, el a bula riba, y a bin serka Jesus.

51. Y Jesus disí ku né: kiko bo ke mi hasi pa bo? Y e siégu disí ku né: Rabinu, ku mi por mira,

52. Y Jesus disí ku ne: Bai bo fe a salbá bo. Y un bez el a mira, y el a sigi Jesus riba kaminda.